

同知事沈彥光曰今此之事朝廷所共議而非緣衣白華反理之事也
媵妾亦不可無也若能正其家則嫡妾之分截然而尊者自尊卑者自
卑無相瀆僭逼之患矣憲府疏意只在於此也千金之子雖在下人亦
有嫡妾況以儲副之貴無繼嗣而選入良娣有何妨焉世子雖曰年少
春秋已過二十求所以繼嗣之繁 聖慮至當謹思曰世麟所謂側室
雖或有慶不可以此為繼嗣之言至為非矣其所以廣繼嗣之道欲其
則百斯男之慶而已彥光曰世麟之言至為非矣但欲其有蠡斯之慶而
已豈以此為繼嗣乎 上曰世麟之言亦非以加選良娣為不可也其
意以為世子時年尚少自當有元孫徐為選入似可云而非以為終不
可選入也其曰嚴明嫡庶之分使不至於紊亂者至當之論也○臺諫
啓前事不見○夜艮方坤方有氣如火○乙未政院以世子師傅意啓
曰世子嬪父朴壻今月十三日遷葬故嬪服色考于禮曹則無儀軌而
於五禮儀註亦無其制常時若親往墓所之人則一以初喪禮為之而
此則在宮中而不與他人同矣事畢之間以淺淡服權宜行之何如傳
曰如啓○臺諫啓前事不見○丙申臺諫啓前事不見○丁酉成均館
知事金安老同知事柳溥金麟孫大司成元繼蔡啓曰臣等職帶養育